



Piçui tifôs in librarie: un mont di libruts colorâts par lei, imparâ e divertîsi

Vino di lei une storie? In librarie la sielte e je grande, i fruts a puedin divertîsi cu lis aventuris di Gjat Ut, ridi e imparâ cu lis contis matucelis di Free e Ulli, rifleti e confrontâsi cu lis storiis des gnovis Fameis furlanis.

Tai ultins mês la Agenzie Regionâl pe Lenghe Furlane e à finanziât e realizât, adun cun diviers sogjets de editorie furlane, dute une schirie di materiâi pensâts pai fruts plui piçui, de scuele de infanzie fintremai aes elementârs. Prodots editoriâi di alt nivel cun storiis divertentis, une grafiche curade e colorade,

contignûts modernis e mai scontâts. I frutins plui piçui a puedin divertîsi, adun cun mame e pai, leint lis storiis di Free e Ulli: une moscje cetant simpatiche e un elegant crot inglès che insieme a zuin, a van ator, a ridin e, soregut, a fevelin par furlan e par inglès. Storiis curtis e semplicis, pensadis propit pai frutins che si svicinin al mont dai libris. I cinc libruts a son stâts realizâts di Futura Edizioni, la cooperative sociâl di simpri atente e une vore ative tal cjamp de disabilitât.

Simpri pensadis pe fasce di età jenfri i 0 e i 5 agns, a son po daspò lis storiis ironichis, coloradis e semplicis di Gjat Ut e dai siei amis, ideadis di Deborah Crapiz e Doriana Alessio. Trê libruts cu lis aventuris dal felin simpatic e tarondut che a fasin ridi grancj e piçui. Cun di plui Gjat Ut al è ancje protagonist di un biel memory: un zûc di cjartis coloradis che al jude a memorizâ i nons dai animâi par furlan, ma che al insegne ancje a ricognossij. Une maniere par imparâ divertintsi.

Pai fruts un pôc plui grancj invezeit, a son lis storiis des fameis furlanis 2.0, scritis e ilustradis di Francesca Gregoricchio pe Kappa Vu, che a contin lis diviersis manieris di jessi famee inte societât di vuê. Maris che a fasin il marangon,



paris che a soproessin, fameis slargjadis dulà che si fevelin lenghis diferentis: i cambiaments sociâi e culturâi di chescj agns a àn influît in maniere fuarte ancje sul concet di famee. Mestris e gjenitôrs a àn di confrontâsi cun chestis situazions par judâ i fruts a vivilis in mût seren, tant che une ricjece culturâl. In chestis storiis i fruts a son i protagonistis e nus descrivin la lôr realtât in maniere delicate e spontanee, cemût che dome lôr a san fâ.

Materiâi gnûfs, biei e modernis, studiâts par incressi l'interès dai fruts no dome ae lenghe furlane, ma ae leture. Parcè che lei, soregut cuant che grancj e piçui lu fasin

insieme, al è divertent e al jude a cognossi il mont.

Se us vin stiçade la curiositât, o podês cjatâ i libris in vendite in dutis lis librariis. A ogni frut il so librut, e par furlan o vin storiis par ducj i guscj!

Federica Angeli

Par informazions:
www.arlef.it
arlef@regione.fvg.it
tel. 0432/555812

Par cure de:

